

7. september 2019

UKA2019/98

Peqqinnissaq pillugu ataatsimiititaliarsuup sulinissaanut tungavissiamik UPA2020-mut siunnersuummik saqqummiusseqqullugit Naalackersuisut peqquneqarnissaannik aalajangiiffigisassatut siunnersuut. Ataatsimiititaliarsuaq peqqinissaqarfimmi ataatsimut isigalugu pitsanngorsaatisannik inassuseqaasiussaaq, tassunga ilanngullugit sulisussarsiortarneq, sulisut sulisoriinnarnissat kiisalu Danmarkimik nunanillu allanik suleqateqarneq. Inassuteqaatit peqqinissaqarfimmi aaqqissuusseqqinnissamut Inatsisartut politikkikkut tungavigissavaat. Minnerpaamik peqqinnissamik suliaqartut kattuffii aamma soqutisaqartut Kalaallit Nunaanni peqqinissaqarfissaqarfimmi suliaqarnermik ilisimasaqartut ataatsimiititaliarsuarmi sinniisoqassapput. (Inatsisartunut ilaasortaq Tillie Martinussen, Suleqatigiissitsisut).

Siumut-miit siunnersuuteqartoq inatsisartunut ilaasortaq **Tillie Martinussen, Suleqatigiissitsisut** qutsavigerusupparput.

Siunnersuuteqarnermini siunertarivaa peqqinissaqarfiup innuttaasunut sullissinermini tamanut pitsaasumik kinguneqartuarnissaa, sulisullu ilisimasaqartut eqaannerusumik akuutinneqarlutik suliamut tungasumik immersueqataasarsinnaanissaannik oqariartuuteqarnera taperserparput.

Tassa ataatsimiititaliarsuarmik nunatsinni peqqinissaqarfitta eqqartuiffigineqartarnissaannik peqalernissatsinnik, ukiorpanngortunillu ajornartorsiutigisarsimasatta peqqinissaqarfiup ingerlanerani tusartuakkagut aallaavigalugit susassaqartut akuutinneqarneratigut peqataasoqartarnissaannik ataatsimeersuartarnissamik siunnersuuteqarnera Siumut-miit nuannaarutigalugu oqaatigissuarput.

Siumut-miit pingaartitarivarput nunatsinni peqqinissaqarfitta innuttaasunut sullissineq pitsaassutsimigut inissisimajuarnissaa. Taamaammat Peqqissutsimut Isumaginninnermut Inatsisinillu Atuutsitsinnermut Naalackersuisup pilersaarutimigut oqaatigisai tamakkiisumik Siumut-miit nuannaarutigalugit taperserparput.

Wekendti kingulleq maani Nuuk-mi katuami ataatsimeersuarneq ingerlanneqarpoq. Taallugu NUNAMED 2019. Ataatsimeersuarnermi nunami assigiinngitsuninngaaniit paasissutissat assigiinngitsut ingerlanneqarput soqutiginaqalutillu. Nakorsaqaarnerup tungaatigut nappaatit assigiinngitsut qanoq nakorsarneqartarsimanerat saqqummiisut assigiinngitsut eqqartorpaat. Ataatsimeersuarneq ammarneqarpoq Peqqissutsimut Isumaginninnermut Inatsisinullu Atuutsitsinnermut Naalackersuisumit, ilaqutariinnut peqqissutsimullu ataatsimiititaliaq ataatsimeersuarnermi aamma peqataatitaqarpoq ulluni pingasuni ingerlanneqartumi.

Uagut nunatsinni ataatsimiititaliarsuarmik peqarluta pissutsillu nalunngivillugit peqqinissaqarfiup tungaatigut aaqqiissutissanik pitsaasunik siunertaqarluta ataatsimeersuartarsimasuugaluarutta

qanormita ilaa angusaqarsinnaassagaluqaagut. Pissutsimmi nunatta isorartooruup piffinni assigiinngitsuninngaaniit oqariartuutigineqartartut Siumut-minngaaniit ilisimaarilluarpagut. Atorfissaqartitsinerlu assigiinngissuteqarnerat takornartaajunnaarnikuusoq nalunngilarput.

Assersuutigalugu ippassaani Cannabisoliamik eqqartuinitinni amerlasuutigut paasinarpoq cannabis olia assigiinngitsutigut iluaqutaasarsimasoq. Nunarsuarmioqatitta atugaalersimavaat nappaatinik assigiinngitsutigut innuttaminnut allaat tunisassiannngortitsimavaat pisiniarfeqarnermikkut assigiinngitsunngorlugit. Forskerit misissuisarsimanerat assigiinngitsut pitsaasumillu iluaqutigineqarsimasut tigulaariffigalugit eqqartuinitinni sammingaatsiarparput. Taannaannarlunniit cannabisolia pitsaasumik oqaatigineqartuartartoq eqqarsaatigalugu, uagut namminneq ataatsimiititaliarsuarmik peqarluta ataatsimeersuanitsinni assigiinngitsut sumut atorpeqartarnerannik, nakorsaatillu nutaat nassaarineqarsimasut nunat allat atulersimasaaat immaqa saqqummiunneqarlutik sammineqarsinnaassagaluartut.

Siumut-minngaaniit takorloorparput peqqinnissaqarfimmi nunatsinni tunngasumik siunissami ataatsimeersuartoqartalerpat immitsinnut siuarsarluta nukittorsaatigiinnarumaaripput. Ilinniartitsisummi imminnut nukittorsarniarlutik ataatsimeersuartarput siunertaqaralugu sullitaminnut pitsaanermik angusaqarumallutik.

Taamatut oqaaseqarluta Siumut-miit. Inatsisartunut ilaasortaq Tillie Martinussen, Suleqatigiissitsisut-minngaaneersup siunnersuutaa iluatigalugu Naalakkersuisup allannguutissatut siunnersuutaa ilalerparput. Siunnersuutip ataatsimiititaliamut ingerlateqqinnissaa inassutigaarput.

Mala Høy Kuko
Siumut